

BOSNA I HERCEGOVINA
FEDERACIJA BiH
ZENIČKO-DOBOJSKI KANTON
GRAD ZENICA
Služba za socijalnu zaštitu, stambene poslove i društvene djelatnosti

Broj: 07-45-12533/22
Zenica, 08.06.2022. godine

STRUČNA SLUŽBA GRADSKOG VIJEĆA

PREDMET: Stav Službe, Izvještaj o radu Javne ustanove Muzej grada Zenica za 2021. godinu,
- dostavlja se

Muzej grada Zenice osnovan je Rješenjem Skupštine opštine Zenica broj: 01-2-505/1 od 22.02.1968. godine. Vijeće opštine Zenica donijelo je Odluku o zadržavanju prava osnivača na sjednici održanoj 11.07.1996. godine.

Muzej grada Zenice pruža usluge i svoju djelatnost obavlja na više lokaliteta: u sjedištu Ustanove, novoj zgradi Muzeja, ul. Muhameda Seida Serdarevića bb, Sinagogi - Jevrejska1, srednjovjekovnoj tvrđavi u Vranduku, Bosanskoj kući u Vranduku i arheološkom lokalitetu u Putovićima.

Osnovna djelatnost Muzeja obavlja se u novoj zgradi Muzeja grada Zenice gdje je postavljeno sedam stalnih muzejskih zbirki (arheološka, dvije historijske, dvije etnološke, numizmatička i Zbirka medija XX stoljeća) a uz to se i realizuju povremene likovne i historijske izložbe, muzički programi, promocije knjiga...

U Bosanskoj kući postavljena je stalna etnološka postavka, a organizovane su brojne radionice za mlade, te promocije međunarodnih muzejskih projekata. Tvrđava u Vranduku i Bosanska kuća služe za prezentaciju srednjovjekovnog i etno naslijeđa, između ostalog posredstvom stalne historijske postavke o srednjovjekovnoj Bosni u Velikoj i Maloj kuli, kao i uređenim trgovištem u citadeli tvrđave, postavljenim imitacijama meta, lukova i strijela.

Svoju djelatnost Muzej grada Zenice obavlja u skladu sa Odlukom o osnivanju i misijom Ustanove. Naročita pažnja se posvećuje radu sa mladima, naročito učenicima osnovnih škola. Muzej grada Zenice realizacijom raznorodnih programa (muzejskih izložbi, likovnih izložbi, muzičkih programa, filmskih revija, književnih promocija, naučnih predavanja, radionica) nastoji privući, osim redovne publike i djecu i omladinu koji su bili njihovi redovni posjetioci.

U toku 2021. godine Muzej je ostvario saradnju s naučnim radnicima i umjetnicima iz Crne Gore, Hrvatske, Srbije, Makedonije, Bugarske, Švedske, SAD, Austrije, Češke, Slovačke, Njemačke, Crne Gore, Albanije, Slovenije, Velike Britanije itd. Tokom 2021. organizirano je 180 promotivnih programa i radionica, od čega osam međunarodnih. Programe muzeja u dva objekta, glavnoj zgradi, tvrđavi Vranduk i sinagogi posjetilo je **3.918 osoba**. Pri tom je bilo 2.831 redovnih posjeta, tj. uz prodane karte. Ukupno je bilo **6.749** posjetilaca.

Muzej grada Zenice osvojio treću nagradu "Destination of Sustainable Cultural Tourism" u kategoriji Archaeological Sites and Museums as Cultural Tourism Attractions, a koja je dodijeljena na ceremoniji u sklopu godišnje Konferencije o kulturnom turizmu u Atini. Okvirna tema ovogodišnje dodjele nagrada je bila "Regenerating European Tourism through Culture, Heritage and Creativity". Ova nagrada je značajna i stoga što je dodjeljuje European Cultural Tourism Network, jedina panevropska mreža za kulturni turizam. Ona ima za cilj pojačati vidljivost evropskih kulturnih turističkih destinacija, graditi platformu za dijeljenje znanja i iskustava te promovirati mrežu.

JU Muzej grada Zenice realizira sa partnerima iz Crne Gore, Bijelo Polje, NVO Akademija, Radio Bijelo Polje, JU Ratkovićeve večeri poezije, Srbije, Lapovo, Biblioteka "Slovo", Dom kulture u Lapovu, regionalni projekat "Iliri, zajednička baština" pod pokroviteljstvom Western Balkan Fund. U okviru projekta održane su književne i strip radionice te objavljene regionalne zbirke priča, "Drevni Iliri", renomiranih autora iz 9 država, "Putevima Ilira", učenika iz BiH, Crne Gore i Srbije. Knjige su promovirane u Zenici/Vranduk, Lapovu i Bijelom Polju. Objavljena je i knjiga stripa "Stope u vremenu", učenika iz BiH, Crne Gore i Srbije, te promovirana uz postavljanje izložbi stripa u Zenici, Lapovu i Bijelom Polju.

Tokom programa Festivala u Vranduku su promovirane i knjige renomiranih regionalnih književnika Alme Zornić i Danijele Vuličević, te književnika Kemala Musića, te sabrana djela Rista Ratkovića, u izdanju JU Ratkovićeve večeri poezije.

Program je upotpunjen održavanjem viteških igara, streljačkog turnira, te prezentacije srednjovjekovne kuhinje u tvrđavi Vranduk. Finansiraju Western Balkan Fund, ZE-DO kanton i Federalno ministarstvo kulture i sporta.

Okončana je druga faza radova na fasadi Sinagoge: po okončanju prve faze radova na fasadi Sinagoge, februar i mart 2021., dovršeno je čišćenje i prebojavanje fasade na licu objekta i krilu okrenutom prema Titovoj ulici. Obojeni su takođe ukrasni elemenati na fasadi u kombinaciji više boja. Naravno, nanošenje fasadne boje obavljeno je nakon grundiranja. Radovi dovršeni sredinom maja 2021. Radove finansira Grad Zenica.

U okviru međunarodnog projekta austrijske Akademije nauka, Muzeja grada Zenice, te studenata Filozofskog fakulteta u Sarajevu vrše se arheološka istraživanja na lokalitetu Kopilo: austrijsko-bosanska kooperacija. Ova istraživanja se vrše u okviru većeg trogodišnjeg projekta "Vizualizacija nepoznatog Balkana".

Arheolozi su ispitivali brončano i željeznodobna naselja u jednom specifičnom krajoliku Srednje Bosne, dolinu rijeke Bosne i okolna brda i naselja. Cilj projekta je upoznati ljudske, prethistorijske zajednice na Balkanu, od prvih stočarsko-zemljoradničkih populacija do početka Željeznog doba.

Na Kopilu, utvrđeno je, postoji kontinuitet naseljavanja od najmanje 800, 900 godina, počevši od kasne bronce do latinskog perioda, do 2. stoljeća prije nove ere. U ovogodišnjim ispitivanjima istraženi su lokaliteti iz željeznog i bronačnog doba, okvirno oko 3.000 godina prije našeg vremena, drugi milenij prije nove ere. Uočeno je dasu su sva naselja građena na veoma visokim pozicijama, sva imaju forifikacijske sisteme. Radove finansira vlada R Austrije.

Muzej zapošljava 12 zaposlenika od sistematizacijom predviđenih 23. Nedostatak kadra nadomješta se angažiranjem pripravnika putem Zeničke razvojne agencije ZEDA.

Muzej se u 2020. i 2021. suočio sa objektivnim problemima usljed pandemije, koja je uzrokovala skoro trostruko slabiju posjetu u odnosu na prethodnu, 2019. godinu. Vlada ZE-DO kantona, u

skladu sa mjerama Kriznog štaba, zabranila je organizirane posjete učenika, što se desilo u većini kantona u FBiH. Posljedica pandemije je i značajno manja zarada u odnosu na prethodne godine, dakle, manje prodatih karata za obilazak muzejskih postavki. Riječ je o za **94,12 %** manjem prihodu u odnosu na 2019., tokom 2020., te **53,05 %** tokom **2021.**

Višak prihoda nad rashodima u Muzeju grada Zenice 24.12. 2021. iznosi **57.836,06 KM**. Sva su sredstva namjenski utrošena. Višak prihoda nad rashodima ustanove koristi se za obnavljanje i razvoj djelatnosti, ako aktom o osnivanju nije drugačije određeno.

Sva su utrošena sredstva iz transfera prema ustanovi tokom 2021., Evropska komisija, Fondacija WBF, The Hedley Trus UK, Evropsko kulturno naslijeđe, Federacija BiH, ZE-DO kanton, Grad Zenica, uredno opravdana.

Struktura zaposlenih u Ustanovi:

- po školskoj spremi: 6 zaposlenika je VSS, 1 VŠ, 3 SSS, 1 NK, 1KV, 1 kustos *historičar/pripravnik VSS*

Šest zaposlenika raspolaže visokom, jedan višom stručnom spremom, od čega je petoro položilo stručne muzejske ispite. Prosječna starost zaposlenih je 45 godina. Stručno usavršavanje zaposlenika rješava se redovnim upućivanjem na stručne seminare, te pomaganjem u pohađanju postdiplomskih studija. Dvoje zaposlenika pohađa postdiplomske studije.

Saradnja Službe sa menadžmentom Ustanove je dobra u smislu pristupačnosti, međusobne komunikacije i realizacije osnivačkih obaveza, a nastavljena je saradnja i sa Upravnim odborom Ustanove.

Cijeneći sve navedeno, a s obzirom na prezentirane pokazatelje o radu, rukovođenju, upravljanju i nadzoru nad radom Ustanove, Služba za socijalnu zaštitu, stambene poslove i društvene djelatnosti dostavlja Gradskom vijeću Izvještaj o radu JU „Muzej grada Zenice” za 2021. godinu na razmatranje.

S poštovanjem,

Prilozi:

1. Izvještaj o radu JU „Muzej grada Zenice” za 2021. godinu
2. Bilans uspjeha za period 01.01.2021 – 31.12.2021. godine
3. Odluka o usvajanju Izvještaja o radu u 2021. godini
4. Odluka o ocjeni rada direktora u 2021. godini

Šef Odsjeka za društvene djelatnosti

Z.I.



POMOĆNIK GRADONAČELNIKA

Sumea Mujkanović